

# Spezialist da cartel cun dun linguistic e giuridic

Advocat en ina da las grondas chanzlias svizras per dretg d'economia

DA CLAUDIA CADRUVI / ANR

■ **Gion Giger è advocat per dretg da cartel ed ha in grond dun da linguatgs. Senza difficultads explitgescha el per rumantsch constellaziuns cumplitgadas, per exempel davart imports parallels. Sias publicaziuns cumparan per part en englais e sia clientella po el cussegljar perfin per talian u franzos.** Talas cumpetenzas – tant professionalas sco linguisticas – spetga la chanzlia Walder Wyss da sia glied. 160 experts per dretg d'economia e tschient ulteriurs emploiads lavuran en la chanzlia che cusseglia interpresas naziunalas u internaziunalas. La chanzlia ha biros en l'entira Svizra. Giger lavura en la sedia a Turitg nua ch'el fa part da la gruppa che sa fatschenta cun la tecnologia d'infurmasziun, il dretg davart bains immaterials ed il dretg da cartel.

## Cussegljar cartelants

«Tge ch'occupescha ils giurists da dretg da cartel da preschent èn cas da submissiun», di Giger. Sch'il maun public u er in'interpresa privata scrivian or in'incumbensa ed inqual interpretider coordineschia tgi che survegn la lavur per tge pretsch «n'è quai cleramain betg lubì». Talas cunvegnientschas cuntrafan al dretg da cartel e la cummissiun da concorrenza (Weko) ha sentenzià ils davos onns impressaris en ils chantuns Tessin, Argovia, Turitg, Son Gagl, Sviz e questa stad er en la Val Müstair.

Ina spezialitad dal dretg da cartel saja il whistleblowing, explitgescha Giger. «In interpretider po dar tiers tut e lavurar ensemen cun la cummissiun. Sch'el è l'emprim che fa quai, ha el la schanza ch'el na survegn nagina multa.» In cartel saja fitg complex e grev da mussar si. Entrar il whistleblowing vegnia la cummissiun tar mussaments. «I po esser che la Weko è gia en chasa tar in interpretider ed interquera ses biros ch'ins sa decida anc per ina collavuraziun.»

Auters clients accumpognian ins tar l'interrogaziun e procurian ch'els survegnian la duida udida giuridica. Sco advocat empovian ins da defender ils clients uschè bain sco pussaivel u almain dad influenzer l'autezza da la multa che stoppia avoir ina tscherza proporziunalitad cun la culpa da l'interpretider.

## Fin al tribunal federal

Sper sia occupaziun sco advocat è Giger docent a l'Universitad da Turitg ed instruescha dretg d'obligaziun, en spezial il dretg da cumpra. El è sa spezialisà sin contracts da distribuziun nua ch'i dat magari constellaziuns spinusas: Tge ha per exempel da capitar sch'in producent chala da furnir rauba ed il martgadant perda perquai tuttenina sia clientella? Sto il producent star botta per las perditas dal martgadant? En talas dumondas ha Giger defendì clients gia fin al tribunal federal a Losanna.

Impressunanta è era sia glista da publicaziun. En in commentari digital sa fatschenta el cun la sentenza da Nikon:



Las sentenzias da la Weko procuran per in tschuat lavur per advocats sco Gion Giger ch'èn spezialisads sin dretg da cartel.

FOTO C. CADRUVI

La dretgira administrativa federala ha confermà l'onn passà ch'il producent da cameras sto pajar ina multa da 12 milliuns perquai ch'el ha impedì imports parallels e procurà uschia ch'ils pretschs per cameras ed objectivs restan auts.

«Il dretg è cler, in producent sto lubir imports parallels», di Giger. «L'idea davostiers è da cumbatter ils chareschia pretschs en Svizra.» Il giurist è dentant sceptic che quest recept funcziunia. Il problem sajan cunzunt las quantitads: Sch'in vendider da coca cola cumpra, empè tar il distributur svizzer, las bavrondas per in meglier pretsch en l'exteriur, saja quai difficil da survegnir avunda pa-

lettas. «Ch'ils imports parallels hajan l'effect general ch'ils pretschs vomian engiu, hai jau dubi», di l'advocat. Ils pretschs en noss pajais hajan plitost da far cun las pajas, ils pretschs d'immobiglias u cun las prescripziuns en l'agricultura che chatschian ad aut ils custs per charn e products agrars.

## Giurist empè da politicher

Gion Giger è creschì si a Cuira en ina famiglia rumantscha, sia mamma deriva da Sevgein e ses bab da Disla-Mustér. Suentar la matura ha el studegià giurisprudenza a Berna. En sia dissertaziun ha el tractà la tematica «Corporate governance sco nov element en il dretg svizzer davart la societad anonima». Suentar la patenta d'advocat ha el studegià in onn dretg da cartel a Londra. Là ha el emprendì d'enconuscher sia dunna – medemamain ina Svizra e studenta en il medem curs.

Gia durant il gimnasi haja el s'interessà per politica e l'organisaziun dal stadi. In cusrin che ha studegià giurisprudenza ha influenzà in pau sia schelta. En il Grischun è il giurist stà activ en la politica ed ha presidià la pcd giuvna. A Turitg è el anc s'engaschà en la suprastanza da la partida, ma dapi ch'el è bab manca simpelmain il temp. «Sch'jau avess vulì far carriera politica en la pcd avess jau stui turnar en il Grischun e betg star en questa partida en la citad da Turitg.» Gist en dumondas dal dretg da cartel saja el pli liberal che la pcd. El beneventia bain reglas cleras e ch'ins dettia multas per cumportaments che cuntrafetschian al prin-

cipi da concorrenza, ma ins stoppia era resguardar la proporziunalitad e tge effect economic ch'in cumportament haja propi. «Ozendi sajettan ins magari cun chanuns sin paslers», di l'advocat.

## Tschaffen da cudeschs antics

«L'emprim cudesch stampà en il Grischun, quai fiss insatge ch'ins avess gudent», tradescha Giger. Sia predilecziun ha cumenzà cun cudeschs antics giuridics, en il fratemp rimna el publicaziuns veglias tudestgas, talianas e rumantschas che han ina relaziun cun il Grischun. Ina da sias preziusas è la «Raetia» dal cronist grischun Johann Guler von Wyneck (1562–1637). Era las emprimas biblas stampadas en sursilvan u en ladin – «La Sacra Bibla» – èn en ses possess. Il tschaffen vegnia in pau da ses tat Gion Rest Capeder che possedeve gia blers cudeschs, di Giger. Per el saja quai oz ina cumbinaziun da l'interess per cudeschs en general, ma era per il Grischun.

## Curt e bun

*Num:* Gion Giger  
*Naschi ils:* 28 da schaner 1975  
*Creschì si a:* Cuira  
*Burgais da:* Sumvitg e Cuira  
*Abitescha a:* Würenlos  
*Stadi civil:* maridà  
*Bab dad:* in figl da dus onns  
*Sport:* ir cun velo e curren  
*Interess:* cudeschs antics grischuns